



Feto Iha PNTL: Inisiativa, Susesu no Dezafiu

Mahein Nia Lian Nú. 61, 21 Outobru 2013



Foto: Steve Christian

Suporta Husi Povu Amerikanu liu husi USAID, Embaxada Finlandia iha Jakarta no Relatoriu Ida ne'e Suporta Atividade Departamentu Hari'i Paz no Koezaun Sosial ho Suporta Orsamentu husi UNDP-Timor-Leste



Website: www.fundasaunmahein.org

Introdusaun

Instituisaun Polisia Nasional Timor-Leste - PNTL hari'i iha 27 Marsu 2000. Desde inisiu establesementu instituisaun PNTL, partisipasaun feto nu'udar pasu ida ba feto Timor-Leste atu ezerse nia direitu hanesan sidadaun ida iha prosesu konstrusaun Nasaun. Tuir Fundasaun Mahein (FM) nia monitorizasaun katak feto lubun balun maka fo sira nia didikasaun no servi iha instituisaun PNTL, ezekuta lei no ordem hodi garante paz no estabilidade.

Partisipasaun feto iha prosesu konstrusaun Nasaun liu husi instituisaun PNTL ne'e signifikante tebes. FM nia monitorizasaun hare katak iha susesu lubuk ida husi lideransa feto nian iha intituisaun PNTL. Susesu no inisiativa husi baze ho rezultadu pozitivu tebes hodi garante paz no hakmatek iha komunidadade.

Maibe susesu no inisiativa hirak ne'e seidak hetan atensaun masimu husi Governu. Komadante Distritu Liquisa Superintendente Natercia Eufrazia Martins ho nia inisiativa serbisu hamutuk ho parseiru dezvoltamentu sira, ONG, lider komunitaria no komunidadade iha Distritu Liquisa hari'i Siguransa Voluntariu (SV) nu'udar modelu pratika polisiamentu komunitaria ba prevensaun konfliktu nian.

Asuntu seluk FM nia monitorizasaun hare katak iha dezafiu balu ba feto iha instituisaun PNTL nia laran. Iha desizaun balu dalabalu ignora tiha feto nia opiniaun no la tau importansia ba preokupasaun sira husi feto no interese feto nian. Dalabalu mos iha pozisaun sira ne'ebé feto okupa maibe laiha poder foti desizaun no rona liu saida maka mane sira ko'alia.¹

Relatoriu ida ne'e nia fokus ba feto iha seitor siguransa, partikularmente iha instituisaun PNTL nia laran. Ne'ebé nia pontu análiza hare ba inisiativa no susesu sira iha lideransa feto nian no dezafiu sira ba feto iha instituisaun PNTL. Informasaun sira ne'e bazeia ba entrevista ho feto PNTL sira no ofisial superior sira, rekolla mos informasaun sira kona-bá asuntu feto nian husi instituisaun relevante no instrumentu ne'ebé FM adopta mos hanesan *Security Sector Discussion* (SSD).

Feto Iha PNTL

Tuir dadus rekapitulasaun PNTL hatudu katak número membru PNTL feto aumenta. Dadaun ne'e membru PNTL feto hamutuk 593 pessoa, ne'ebé koloka iha distritu sanulu resin tolu nia laran, dadus rejista katak membru PNTL feto ne'ebé maka hetan pozisaun hamutuk 148 pesoas no restu hamutuk 445 pesoas maka la hetan pozisaun iha instituisaun PNTL.²

Rekapitulasaun Feto iha PNTL tuir Diviza - 2013

Nú.	Deviza	Pozisaun	Laiha Pozisaun	Total Atual
1	Komisariu	0	0	0
2	Superintendente Xefe	0	0	0
3	Superintendente	1	0	1

¹ Entrevista ho Fontes Membru PNTL Feto iha Komandu Jeral PNTI, Kuarta 19 Agustu 2013

² Dadus husi Departementu Rekursu Umanu Nasional - PNTL. Kinta, 22 Agustu 2013

4	Superintendente Assistente	1	0	1
5	Inspetor Xefe	3	0	3
6	Inspetor	6	7	13
7	Inspetor Assistente	9	6	15
8	Sarjentu Xefe	8	25	33
9	Primeiru Sarjentu	6	3	9
10	Sarjentu	28	112	140
11	Ajente Xefe	58	220	278
12	Ajente Prinsipal	27	44	71
13	Ajente	1	28	29
	Total	148	445	593

Fontes: Departamentu Rekursu Umanu Nasional - PNTL, 22 Agustu 2013

Dadaus ne'ebé FM asesu feto PNTL na'in 148 maka heten pozisaun maibe iha dadus ne'e rasik la indika detallu pozisaun saida maka sira asume, iha deit númeru sira tuir postu ne'ebé sira hetan.³ Komforme kategoria rejime promosaun nian,⁴ feto na'in rua okupa postu ofisial superior iha postu superintendente no superintendente assistente. Nune'e mos iha feto 31 iha postu ofisial inspetor, kategoria sarjentu sira númeru feto hamutuk 182 no ajente sira hamutuk 378.

Bazeia ba informasaun no tabela iha leten hare katak total membru PNTL feto husi total 593 pesoas, iha deit na'in rua maka hetan diviza ofisiais superior, no feto PNTL na'in ida maka hetan pozisaun importante, iha Komandu PNTL nian bazeia ba Kapitulu II, Estrutura Organika, Seksaun I, Komandu PNTL nian, artigu 9 Organizaun Komandu PNTL nian⁵, kompara ho mane PNTL ne'ebé maka ho total deviza ofisiais superior hamutuk 56 Pesoas.⁶

Ho total feto PNTL hamutuk 593 pesoas, iha feto na'in rua hetan deviza ofisial superior no pozisaun iha instituisaun PNTL nia laran maka tuir mai ne'e:

Ofisial Superior Feto PNTL - 2013⁷

Nú.	Naran	Diviza	Pozisaun	Total
1.	Natercia Soares Martins	Superintendente	Komadante Distritu Liquisa	1
2.	Umbelina Soares	Superintendente Assistente	Xefe Seksaun Igualdade Jeneru - PNTL	1
Total				2

Fontes: Departamentu Rekursu Umanu Nasional – PNTL, 22 Agustu 2013

³ To'o relatoriu ne'e pública FM seidak asesu dadus refere husi Komandu PNTL maske FM hato'o ona karta ba Komandu Jeral PNTL maibe seidak iha resposta.

⁴ Dekretu Lei Nú. 16/2009 de 18 de Marsu. Rejime Promosaun Polísia Nasional Timor-Leste Nian

⁵ Dekretu Lei no 09/2009, loran 18 fulan Feveiriu. Lei Organika Polisia Nasional Timor-Leste (PNTL)

⁶ Dadus husi Departamentu Rekursu Umanu Nasional, Sistema Informasaun - PNTL. Kinta, 22 Agustu 2013

⁷ PNTL Rekursu Umanu Sistema Informasaun – PSAD 2011

Inisiativa no Susesu Lideransa Feto iha PNTL

Superintendente Natercia Soares Martins wainhira asume hanesan Komandante Distritu Liquisa, hatudu tiha ona nia inisiativa no kapasidade iha nia lideransa. Komandante Natercia ho inisiativa no esperiensa ne'ebé nia hetan hamutuk ho parseiru dezenvolvimentu sira, ONG, lider komunitaria no comunidade distritu Liquisa hari'i Siguransa Voluntariu (SV). SV hanesan pratika modelu polisiamentu komunitaria.⁸

Hahu tinan 2009 iha distritu Liquisa pratika Polisiamentu Komunitariu Siguransa Voluntariu. SV nia funsaun maka fo protesau, fo informasaun no buka maneira hodi hari'i situasaun seguru, paz no hakmatek ne'ebé hala'o husi individu ka pesoal voluntariu hodi kontribui ba siguransa. Membru SV iha suku ema na'in rua husi joven feto ida ho mos joven mane ida ho lider komunitariu seluk ne'ebé involve rasik.

Inisiativa no asaun PNTL hasoru violensia domestika, tanba Komandu PNTL distritu Liquisa úniku feto ba lideransa iha distritu entaun atendentu kazu violensia domestika la iha eskapa. Komandante Distritu Liquisa Superintendente Natercia Soares Martins haktuir katak, antes nia ba asumi kargu kazu violensia domestika nia volume ass iha distritu ne'eba.⁹

Depois nia asume kargu iha 2010, nia hahu implementa ba nia membru PNTL. Iha PNTL ida ne'ebé involve violensia domestika, depois fen husi membru PNTL mai hasoru komandu Distritu, no halo kedas prosesu investigasaun imidiatu. Nune'e kada formatura dader iha Kuartel Distritu PNTL Liquisa, Komandante Natercia nia liafuan maka'as liu kona-bá dereitu feen ka feto sira nia importante liu iha membru PNTL distritu Liquisa. Nia haktuir katak nu'udar feto ne'ebé asume kargu sei lahusik liu nia maluk feto sira hetan tortura husi mane.

Komandu Distritu Liquisa mos kada fulan vizita ba sub-distritu Bazartete, Maubara ho Liquisa Vila atu observa situasaun real. Durante observasaun iha sub-distritu sira, sorumutu barak ho feto sira ne'ebé grupu la haensan no fo informasaun ba sira katak kazu violensia domestika ne'e sai ona krime públiku. Alen de fo informasaun, Komandante ne'e mos buka lider feto klosan ka ferik sira ne'ebé influencia atu kontinua serbisu hamutuk ho SV iha sira nia aldeia ka suku. Hasoru malu ho feto sira nia objetivu atu fo sai informasaun ba maluk feto sira kuandu hasoru violensia ruma tenke ko'alia sai.

Nune'e mos Komandante distritu Liquisa sempre involve halo diskusaun ho grupu feto sira iha aldeia to'o nivel ho suku to'o sub-distritu sira. Husi distritu Komandu Distritu ne'e husu membru feto ba SV ne'e barak liu. Kada suku tenke feto ida sai membru SV. La'os sai deit membru SV, maibe mos suporta feto hodi fo informasaun ba feto sira atu ko'alia lia los no labele tauk karik sira nia laen ka sira nia maun baku sira iha sira nia uma.

Husi Nivel Nasional, Komandante Natercia nia involvimentu ba ONG sira ne'ebé atu haberan feto. Ho Sekretaria Estadu ba Promosaun Igualidade, sempre fo apoiu ba malu hanesan fahe informasaun kona-bá lei violensia domestika nia. Tanba nia involvimentu maka'as liu atu fo suporta ba feto hatene kle'an liu kona-bá lalaok feto nia involvimentu ba dezenvolvimentu, maka dala ruma

⁸ Martins, Natercia (2013). Komandante Distritu Liquisa. Entrevista Pesoal

⁹ Martins, Natercia (2013). Komandante Distritu Liquisa. Entrevista Pesoal

komadante ne'e mos fasilita fetu sira mai tuir seminar kona-bá fetu iha kapital Dili. Depois lori fetu sira mai no lori fila ba sira nia suku, komandante ne'e mos fo mos informasaun ba fetu sira ne'e atu fo tutan informasaun saida deit maka hetan durante seminar iha Dili. Komandante Natercia nia hakarak halo kapasitasaun ba fetu hatene kle'an liu kona-bá tipu violensia domestika atu nune'e sira bele kria prevensaun ba violensia domestika no bele mos halo advokasia ba fetu maluk sira ne'ebé la iha kapasidade.¹⁰

Maske laiha suporta polítika no orsamentu husi Governu sentral, maibe mobilizasaun komunitariu hare dadaun ona iha baze. Inisiativa ida ne'e hanesan modelu no ezemplu ba prevensaun konfliktu nian. La'os kazu violensia domestika deit maka sai hanesan atensaun husi Komadante Natercia maibe asuntu seluk mos hanesan asaltu hodi dezeña estratejia ba prevensaun nian husi serbisu SV.

Dezafiu ba Fetu iha PNTL

Nu'udar membru PNTL, dala barak fetu hasoru dezafiu oin-oin ne'ebé maka sai dilematika ba sira, maske ho deviza ne'ebé maka superior nomos pozisaun ne'ebé maka bele determina disizaun, maibe sira laiha poder atu halo desizaun.

Xefe Seksaun Igualidade Jeneru PNTL Superintendente Asistente Umbelina Soares hatete:

“Hau nia pozisaun hanesan Xefe Seksaun Igualidade Jeneru maibe hau la hetan asesu ba enkontru Konsellu Superior PNTL nian, tanba deit razaun Lei Organika PNTL la permite, dala barak fetu PNTL mos laiha asesu ka utiliza ekipamentu ka sasan Estadu ho equal, prioridade ba PNTL mane deit. Ofisiais superior mane sira seidak iha kuiñesementu kle'an kona-bá saida maka igualidade jeneru, ami bele organiza treinamentu ka workshoop ruma maibe sira la partisipa ho diak, mai abertura hotu sira iha razaun barak atu fo hodi sira lakohi atu ulun moras ho problema fetu PNTL nian.

Asuntu seluk hakait iha promosaun PNTL nian, hare hanesan laiha transparansia, ami fetu ne'ebé maka ho rezultadu exame hetan valor boot maibe la promove nusa maka sira seluk valor kiik maka hetan promosaun no komisaun promosaun la fo sai ami nia falla iha ne'ebé.”¹¹

Kazu seluk iha ambitu foti desizaun nian, membru PNTL mane sira dala barak konsidera fetu PNTL laiha kapasidade atu halo desizaun, la importante atu rona fetu nia lian ka ideias tanba la rasional, ho razaun hirak ne'e dala barak fetu PNTL nonok no simu deit saida maka PNTL mane sira diside ona hodi hala'o tuir sira nia desizaun maske dala barak sira la konkorda ho asuntu sira ne'e no hili nonok deit. Nune'e mos fetu sira dalaruma tauk wainhira atu diside buat ruma, maske hanoin ne'e los.¹²

Dezafiu seluk hanesan “voz ativa” ne'ebé maka laiha atensaun husi superior mane sira sai hanesan dezafiu ida ba PNTL fetu atu serbisu ho diak tuir papel PNTL fetu iha instituisaun nia

¹⁰ Martins, Natercia (2013). Komadante Distritu Liquisa. Entrevista Pesoal

¹¹ Soares Umbelina, Xefe Seksaun Igualidade Jeneru PNTL. Segunda, 30 Setembru 2013

¹² Entrevista ho Fontes Membru PNTL Fetu iha Komandu Jeral PNTL. Kuarta 19 Agustu 2013

laran. Ho dezafiu sira ne'ebé maka feto hasoru iha sira nia atividade nu'udar PNTL feto no fo influencia ba sira nia psikolojia katak PNTL mane maka iha liu poder. PNTL feto lapresiza ba area operasaun, la importante atu iha balansu entre PNTL feto no mane iha area ne'ebé maka kaer pasta halo disizaun nian. Feto sai opsaun segundu iha instituisaun nia laran ne'ebé maka nia kapasidade merese liu kuandu iha jestaun no administrasaun nian.

Asuntu hanesan, inisiativa no susesu sira hatudu iha baze ba prevensaun konflitu nian ne'ebé involve kamada sosial tomak hanesan forsa siguransa ida. Pratika ida ne'e hatudu tiha ona iha Komadante Natercia nia lideransa, rezultadu hatudu estabese sistema *miss call* wainhira iha problema ruma SV sira *miss call* ba PNTL hodi halo atuaun. Monta SV iha estrada internasional Liquisa to'o Loes wainhira iha asaltu, asidenti ka problema seluk kontaktu lalais ba PNTL no asaun sira hasoru violensia domestika. Maibe seidak hetan atensaun masimu husi Governu hodi investe ba inisiativa hira ne'e. FM hare katak inisiativa hirak ne'e hanesan patrimoniu no forsa sosial ida ne'ebé inisia husi baze no comunidade sira sente hanesan na'in maske serbisu voluntariu deit no nia rezultadu hatudu tiha ona iha prevensaun konflitu nian.¹³

Sumariu Rekomendasaun

1. Rekomenda ba SEPI no Rede Feto ne'ebé sai mahon ba feto iha Timor-Leste atu hare nesesidade no importansia ba feto sira ne'ebé maka involve iha seitor siguransa no defeza, liu-liu abilidade ne'ebé maka sai razaun fundamental ba feto nia papel hodi sira labele hetan violasaun.
2. Rekomenda ba SEPI atu hala'o treinamentu kle'an kona-bá asuntu igualidade jeneru iha instituisaun siguransa, liu-liu iha instituisaun PNTL no halo observasaun no análise kona-bá implementasaun no intendementu kona-bá igualidade jeneru ne'e to'o iha ne'ebé ona.
3. Rekomenda ba Sekretaria Estadu Siguransa, instituisaun atu kapasita maka'as liu tan feto iha instituisaun PNTL nia laran liu husi edukasaun formal no naun-formal, no fo bolsu estudu ba feto sira ne'ebé ho edukasaun minimu hodi hasa'e sira nia kapasidade hodi nune feto iha preparasaun ba sira nia ann rasik iha instituisaun nia laran atu bele sai hanesan ema importante hodi bele foti desizaun iha instituisaun ne'e rasik.
4. Rekomenda ba Ministériu Defeza no Siguransa liu husi Konsellu Ministru atu halo revizaun ba Dekretu Lei Nú. 09/2009 Lei Organiku PNTL nian atu estabese asuntu igualidade jeneru sai hanesan departementu ida iha PNTL nia laran, ne'ebé maka iha *gender policy* ne'ebé klaru tuir PNTL nia nesesidade.
5. Rekomenda ba Komisaun B Parlamentu Nasional no Grupu Feto Parlamentar atu halo fiskalizaun ba asuntu feto nian iha instituisaun siguransa no alerta rekomendasaun sira ne'e ba Governu hodi hadia asuntu jeneru iha instituisaun siguransa.

¹³ Martins, Natercia (2013). Komadante Distritu Liquisa. Entrevista Pesoal

6. Rekomenda ba Sekretaria Estadu Siguransa presiza apoiu politika no orsamentu ba atividade polisiamentu komunitaria ne'ebé ho iniciativa hari'i Siguransa Vountariu iha distritu nu'udar ezemplu ne'ebé hatudu husi lideransa feto PNTL.

Bibliografia

Entrevista

Amaral, Moises (2013). Diretor Rekursu Umanu Nasional PNTL. Entrevista Pessoal

Entrevista ho Fontes Membro PNTL Feto iha Komando Jeral PNTL. Kuarta 19 Agosto 2013

Martins, Natercia (2013). Komadante Distrito Liquisa. Entrevista Pessoal

Soares Umbelina, (2013). Xefe Seksaun Igualdade Jeneru PNTL. Entrevista Pessoal.

Dokumentu

Dados husi Departamentu Rekursu Umanu Nasional, PNTL. Kinta, 22 Agosto 2013

Dekretu-Lei Nú. 09/2009, loran 18 fulan FEVEREIRU. Lei Organika Polisia Nasional Timor-Leste (PNTL)

Dekretu Lei Nú. 16 /2009 de 18 de Marsu. Rejime Promosaun Polisia Nasional Timor-Leste Nian